

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Man
Ava'e Atoa.


Te hoo: E Piti Toata i te Matahiti.

Nu. 3

Mati 1935

Mat. 29

*To'u Fare mo'a, tei faauehia i to'u mau taata ia patu i te
mau tau atoa i roto i To'u ra i'oa mo'a. B. F. 124: 39, 26, 27.*



Te Mau H'iero No Teie Tau.

TUAATIRAA

*Inaha, e tonono na vau i te peropheta ra ia Eliaha ia ou-
tou na, a tae atu ai i taua mahana rahi mata'u o Ie-
hova ra: ia faafariu oia i te aau o te mau metua e te tamarii,*

e te aau o te tamarī e to ratou mau metua, o te haere mai hoi au, e o te tairi i te fenua nei i te ino. Malaki 4:5, 6.

I muri a'e i te tau a parahi ai o Iesu i nia i te ao nei, ua ore roa To'na mana i rotopu i te taata, e ta'na Ekalesia ua iriti-ê-hia'tu mai roto atu i te taata nei e aita roa te Ekalesia i nia i te ao nei, no te mea, aita te mau taata i haapao i te mau ture, e ua taue ratou i te ture e ua taparahi i te mau peropheta. *Ua viivii te fenua i raro a'e i te taata ra; ua hapa ratou i te ture ra, ua ruri-ê-hia e ratou tei haapaohia ra; ua pi'o ratou i te faufaa haapao tamau hia ra. Isaia 24:5.*

Inaha, te na ô maira te Fatu ra o Iehova, te fatata maira te tau e hopoi atu ai au i te o'e i nia i te fenua, e ere râ i te o'e maa ore e te hiaai i te pape, i te faaroo râ i te parau a Iehova, e horo hoi te taata i te tahi miti e te tahi miti; e mai te apa-toerau e tae roa'tu i te hitia o te râ i te hororaa e te ho'iraa mai, i te imiraa i te parau a Iehova, e ore roa râ e itea. Amosa 8. 11-12.

Nahea te mau taata o tei parahi i nia i te ao nei i tera tau, aita roa te tahi pae i ite i te ture? e te na ô hia maira:

O te feia atoa o te hinaaro i te haamaitai i to'u nei rima, e mea tia ia haapao ratou i te ture tei haapaohia no taua haamaitairaa ra, e taua huru ra, ua haapaohia ia hou a'e te hamaniraahia o teie nei ao.— Oia mau, Oia mau, te parau atn nei au ia outou, ia ore outou ia haapao i ta'u mau ture, e ore roa e noaa, ia outou, taua hanahana ra.— Eita roa e tia ia faaorahia te taata na roto i te poiri.— Te hanahana o te Atua, o te ite ia, oia hoi, te maramarama e te parau mau. B. F. 132:5, 21; 131:6; 93:36.

E te na ô maira o Ioane: Ua parau atura o Iesu, Amene, Amene, e parau atu vau ia oe, Ia ore te taata ia fanau i te pape e te Varua, e ore oia e ô i te basileia o te Atua ra. Ioane 3:5.

Eaha te hopea o to tatou mau tupuna tei pohe, ua mo'e anei ratou? e haere ratou i hade no te mea aita ratou i haapao i te hoê ture tei ore i itehia e ratou? Ua pohe anei o Iesu no tatou ana'e o tei ora i te anotau hopea nei? Aita, ua tae

te taraehara o te Mesia i nia i te mau taata atoa, tei pohe na mua i to'na taeraa mai i raro nei, i nia i te ao nei, e tei ora i te tau o Iesu iho e o tei fanauhia mai i teie tau hopea nei.

E ua poroi iho oia ia matou e, e parau haere matou i te taata, e faaite hua'tu e oia tei haapaohia e te Atua ei haava i tei ora e tei pohe ra hoi.— No reira hoi te Mesia i pohe ai, e i tia faahou ai i nia, e e tia hoi oia i te oraraa, ia riro oia ei Fatu no tei pohe o no tei ora hoi. Ohipa 10:42: Roma 14:9.

Te haapii nei ratou i te Evanelia i paradaiso i teie nei. I parau atoa hia'tu ai hoi te evanelia i te feia i pohe ra, i faahapahia'tu ai ratou o te taata i te tino ra, te ora râ ratou i te Atua i te Varua ra.— O tana ia i a'o atu i te mau varua e vai i roto i te tapearaa i teie nei. 1 Pete-ro 4:6; 3:19.

Area ra te na ô hia maira i roto i te Ioane 3:5: Ua parau atura Iesu, Amene, Amene, e parau atu vau ia oe, Ia ore te taata ia fanau i te pape e te Varua, e ore oia e ô i te basileia o te Atua ra. Ua papu atura ia tatou e, aita e baptizoraa i reira, e ia ore ratou ia baptizohia eita ratou e ora. E homa tera te tumu ua tonohia mai te peropheta ra o Eliaha, ia afai mai oia i te mana e te mau taviri ia tia, ia tatou, ia rave i te ohipa no to tatou mau tapuna tei pohe. Ia oti teie nei orama, ite faahou â a'era maua i te hoê orama hanahana rahi i mua i to maua aro, o Eliaha ia, tei fâ maira, te peropheta tei ravehia i nia i te ra'i ma te ite ore i te pohe, te tia noa ra oia i mua i to maua aro, i te na ôraa e. Inaha, ua tae tia mau mai te tau i tohu-ê-hia na e Malaki e, e tonohia mai oia, o Eliaha, - ia faafariu mai te mau aau o te mau metua i te mau tamarii, e te mau aau o te mau tamarii i to ratou mau metua, o te tairihia te fenua taatoa i te ati. No reira i tuuhia mai ai te mau taviri no taua tau ra i roto i to orua pue rima. — E o Eliaha atoa, ta'u i horoa te mau taviri no te mana no te faafariuraa i te aau o te mau metua i ta ratou mau tamarii, e te aau o te mau tamarii i to ratou mau metua, ia ore hoi te fenua taatoa nei ia tairihia i te ino.. — No reira, a faaore i te tama'i e a poro i te parau no te hau e a titau maite atu i te faafariuraa i te aau o te mau tamarii i to ratou mau metua, e te aau o te mau metua i to ratou mau tamarii. B. F. 110:13.16: 27:9; 98:16.

E mea tia ia ravehia taua ohipa ra no te mea te na ô hia maira: E faatuatiraa e vai nei i rotou i te mau metua e te mau tama-

rii - o te baptizoraa ia no te feia i pohe ra. No te mea, ia ore tatou nei i tuaatihia 'tu ia ratou ra, aore ia e noaa, ia tatou, te huru hanahana tia mau ra. E ia ore ratou ia tuaatihia mai ia tatou nei, aore atoa ia e noaa ia ratou ra te huru hanahana tia mau ra. E ore hoi e noaa ia tatou, e ia ratou atoa hoi, te hanahana tia mau ra, ia ore ratou, tei pohe i roto i te evanelia, i tuaatihia mai. — No te mea ua vaihohia e te Atua te mea maitai rahi atu no tatou, ia ore ia noaa te maitai rahi roa ia ratou ana'e eiaha tatou atoa ra. B. F. 128:18, 15; Hebera 11:40,

Te haapao nei te Ekalesia a Iesu Mesia i te Feia Mo'a i te Mau Mahana Hopea Nei i teie ohipa maitai e te nehenehe. E 7 Hiero ta te Ekalesia i teie nei; hoê i Roto Miti, Utaha; hoê i Logan, Utaha; hoê i St. George, Utaha; hoê i Manti, Utaha; hoê i Cardston, Canada; hoê i Mesa, Arizona e hoê i Laie, Vaihi. E mau Hiero nehenehe roa teie mau Hiero e e mea patuhia ia no roto mai i te mau ofai nehenehe. Te moni tei pau no te paturaa i te Hiero no Roto Miti ana'e, ua tae ia i te moni ra e toru milioni tara e te afa (3.500.000) moni amerika,

Teie te rahiraa o te mau ohipa tei ravehia, i roto i te mau Hiero, i te hopea o te matahiti 1932.

19.000.000 Oro'a.

8.256.253 Baptizoraa no te feia i pohe ra.

5.700.000 Haamo'araa.

1.000.000 Faaipoiporaa no te pae varua.

1.500.000 tuaatiraa i te mau tamarii i to ratou mau metua.

E i teie nei â mau mahana, te haere noa nei â te mau melo no te Ekalesia, i roto i teie mau Hiero Mo'a, ma te moni ore, e te rave nei ratou i te ohipa no to ratou mau taata tei pohe, ia ora ratou e ia farii ratou i te parahiraa hanahana i te ao i mua. E aue e te oaoa te tupu i roto i te aau o tera mau taata i reira, ia ite ratou e, ua oti to ratou mau oro'a i te ravehia i ô-nei, e ua matara te mau fifi tei tapea ia ratou, e ua tiamâ ratou no te haereraa i mua.

*F faautu'a'i te Atua i te taata atoa i * te faito ta'na i faito atu i te tahi e ra.* B. F. 1.10; B. F. S. 1.2.

Papaïhia e Le Roi Mallory.

Te FAAROO.

Ua o'e roa te ao nei i te Faaroo, e e horoaraa te reira no ô mai i te Atua ra, e e noaa te reira na roto i te haapaoraa i ta'na mau faaueraa. E ere te faaroo i te tiaturi noaraa, no roto roa mai te reira i te aaui e na'na e faatupu te mana'o, i roto i te taata, ia faarue i te ino. E faarahi oia i te faufaa no te oraraa nei, e e faarahi i te maitai no te parau mau; na roto ia'na e faaorehia te oto e te pe'ape'a, e faaore atoa oia i te tapitapi, e i reira e tupu te oaoa i roto i te taata, e faaore oia i te mau mana'o poiri e e haamaramarama oia i te Varua. Mai te mea e tia ia noaa mai, te ao nei, ma te faaroo ore, e haamau'araa faufaa ore ia no te puai.

Te Faaroo nei o te hoê ia poe tao'a rahi mau, no te mea o te mana rahi faatere i te mau mea atoa; na roto ia'na "*te ora nei, te faateiteihia nei, te faahuru-ê-hia nei e aore râ, te vai au noa ra ratou mai te au i te hinaaro o te Atua*". Ahiri aita e Faaroo, eita ihoa ia i oti te hamaniraahia o te ao nei i te pae varua e i te pae tino atoa hoi, aita ia e mana, aita e taata e aita atoa ia e oraraa, no te mea, te Faaroo, o te ture matamua ia no te Evanelia.

O te Faaroo, "*o te tiaturi ia i te mau mea e tiaihia nei, e te ite i te mau mea aore i hi'ohia nei,*" oia hoi, te papuraa i roto i te taata nei, no te mau mea tei ore i hi'ohia e ana; o te hoê ia mana varua te faatere i nia i te mau mea atoa ra, e te tumu oia no te mau ohiparaa atoa ra. O te haamataraa ia no te parau tia, te ofai taahiraa matamua e tae atu ai i te Atua, ia faaroo i te Atua ma te itoitoe e te puai hoi. O te hoê ia mana, te faaroo, te aratai i te Atua ma te titau i te faahaehaaraa e te tatarahapa mau.

E mea tia roa ia faaroo te taata e, te ora mau nei te Atua


e na'na i hamani i te mea atoa, to nia i te ra'i e to raro i te fenna nei e tei Ia'na te paari hope ore e te mau mana atoa. Ia tiaturi papu hia i To'na mana etia'i, area ra ia vai maite â te mana'o e, ¹ *te vai mau ra te Atua.* ² *ia papu maitai te mana'o no nia i To'na huru e to'na tiaraa.* Mai te mea aita te-ra nau mea e piti i roto i te taata, eita e tia ia'na ia faatupu i te faaroo e tae noa'tu te noaaraa ia'na te hanahana rahi, noa'tu e noaa mai te mau haamaitairaa e rave rahi na roto i te faarco, no te mea "*o te haere mai i te Atua ra e mea tia ia faaroo e, te vai mau râ Oia, e na'na e faautu'a mai ia ratou tei imi maite Ia'na*". "*No to'na faaroo rahi i te Atua i arataihia'i o Aberahama i te vahi tei ore i iteahia e ana e ua tai'ohia te reira ei parautia na'na; Na roto i te faaroo ua aratai o Mose i te tamarii o Iseraela, i rapae i Aiphiti, e ua ite mata oia i te Atua; na roto i te faaroo e faaorahia te ma'i, e araara te mata o te matapo, e faaroo te mau taata taria tური, e haere te mau paruparu e e rave rahi atu â te mau mea maere te ravehia.*

E tae mai te mau haamaitairaa, no te ra'i mai, na muri i te haapaoraa i te Evanelia, e teie te fafau i te mau taata'toa tei vai i na otia e maha o te ao nei, te mau haamaitai ta ratou e ani na roto i te faaroo aueue ore, e horoahia mai ia, e haamaitai te Fatu i te taata mai te au i to'na faaroo, eiaha râ no te mau anira; ua na reirahia e e na reira noa hia â. E ture teie no teie nei ao, mai te mea te navai ra te faaroo o te hoê taata, e tia ia'na ia ani i te mea ta'na i hinaaro, e e farii oia i te reira, ei haamaitairaa râ te tia ia anihia.

Ua riro te parau a te Atua ei ite no te reira, e i te tahi vahi ua parauhia ê, "*O tei faaroo i te Tamaiti, te vai ra i roto ia'na iho, te hoê ite api, e ia'na ra e ore roa te Fatu e haapoto i to'na rima, e ua papu roa ia'na e, e tia i te Fatu, tei hamani i te mau mea'toa, ia faahuru e i te mau mea atoa no to'na maitai.*"



E hoho'a teie no te hoê haaputuputuraa no te mau Orometua tahito tei haere mai i teie paeau enua nei. O tei tia noa o *Toma Ruau, Tamati Poropiti, Tanona, Etara, Turita* e o *Etera ia*. O tei parahi ra o *Eraneta Rossitera, Tamarona, Hebera Garanata, Peretiteni* no te Ekalesia, *Pihoti Poropiti* e o *Alama Buratona*.



E hoho'a teie no te mau Hiero no Mesa, Arizona; Cardston, Canada e no Laie, Vaihi.

Te hora o te ati o te hora ia no te itoito, e na to'na faaroo e faaitoito i tei roohia i te ati, mai te hoê pahi e fano ra ma te ie maitai i roto i te ati, ua ita oia e, *tei te hoe to'na Metua* e na'na e tauturu mai ia'na i roto i te ohipa maitai, mai te mea e, o te Atua ana'e ra ta'na e mata'u e i roto i te puairaa o to'na faaroo te tiai ra oia te ora i te Fatu.

Pcpaihia e Lecne H, Kennard.

Te Varua Taata.

E rave rahi te mau mana'o huru ê no nia i te Varua o te taata; ua au te varua i te aho e aore ra i te matai i to te tahi mana'oraa, te parau nei ratou e, aita to te Varua e ite a faataahia'i oia no te hoê tino, e ia pohe teie nei tino ua pohe atoa ia te ite o te Varua, e aita to te apoo e tatarahapa.

E vavahi tatou i te pârau no te Varua taata i na tufaa e toru ra, oia hoi:

- 1.- Nohea mai te Varua Taata?
- 2.- To te Varua huru i ropu i te poheraa e te tia faahouraa?
- 3.- To te Taata nei huru i te tia faahouraa?

E piti hnru to te taata nei, oia hoi, e huru varua e e huru tino; e varua ora tei parahi i roto i teie nei tino tahuti. Ioba 32:8. O Adamu te metua o te taata i te pae tino nei, o vai râ te metua o te Varua taata? O te Atua ia. — “E metua hoi to tatou, to te tino nei, o tei a'o mai ia tatou, e ua faahiti hoi tatou, eiaha ia rahi atu to tatou auraro i te metua o te varua nei, e ia ora'tu.”

Nohea mai te Varua taata? E oraraa to te taata atoa hou

teie nei ao: e ere teie nei ao i to tatou oraraa matamua. A tai'o tatou i te hoê parau maere a te Fatu ia Ioba, " I hea oe Ia'u i hamau i te tumu o te fenua nei, * a fatu atoa'i te mau fetia po'ipo'i i te himene, e ua pii noa te mau tamarii atoa a te Atua i te oaoa?" Ioba 38:4, 7. Te ora râ o Ioba e te mau tamarii atoa a te Atua i te haamau-raa-hia o teie nei ao, aore râ, aita e auraa i ta te Atua u'iraa ia Ioba.

Te mau fetia poipoi tei fatu i te himene e te mau tamarii atoa a te Atua tei pii i te oaoa, o vai ratou atoa ra? O te mau Varua taata ia i to ratou oraraa i te matamua, o tei fanau mai ei taata i roto i teie nei ao. Te fatu ra i te himeue e te pii raa i te oaoa, e tapao ia no to ratou ite e te maramarama.

Te ora râ o Ieremia hou teie nei ao, no te mea na te Atua oia i maiti na ei Peropheta na'na. Ieremia 1. 5. E taata o Ieremia mai ia tatou nei â, e no reira, te faaitehia nei to'na huru hou te ao nei, e to te taata atoa ra huru.

Te ora râ o Iesu Mesia i ô i te Metua ra i te matamua ra. Ioane 6. 61-52. E hanahana hoi to'na i reira. Ioane 17. 5. Na'na teie nei ao i hamani, e a fanau mai ai oia ei taata, oia hoi te Tamaiti fanau tahi a te Atua, i te tino nei. Ioane 1. 1-3, 14.

E teie nei, o vai o *IESU*? O to tatou ia tuaana o Iesu i te pae varua, oia te Matahiapo o te mau Varua i roto i te utu-afare o te Atua. Roma 8. 29. Hoê â metua to Iesu e to tatou i te pae varua, " O te Mesia hoi o tei tamâ mai, e te feia i tamâhia ra, hoê â ia Metua, e ore ai oia e haama ai ia parau mai ia ratou e, e taeae. " Hebera 2. 11.

Ua haapii mai o Iesu ia tatou i te pure i te na ô-raa mai e " *E to matou Metua i te ao ra,* ": e ua na ô hoi oia i te tahi vahi, " *Te haere nei au i tau Metua ra e to outou Metua ra, e i tau Atua ra e to outou Atua ra.* " Ioane 20. 17. Te ite nei tatou e, e Varua ora te taata o tei parahi i roto i te tino po-

he noa. Te Metua, te Tamaiti e te taata nei, no te opu hoê ia, te vai nei te huero Atua i roto i te taata nei, oia hoi, ua roa i te tamarii nei te huru o te Metua. I taua oraraa varua i te matamua ra, ua ite tatou i te maitai e te ino. I te hoê taima ua ite o Iesu i te hoê taata, e mata po mai to'na fanau raa mai â, i reira ua u'i atura ta'na mau pīpī ia'na, *Na vai te hara, na'na iho anei, e nana metua anei, i fanau matapo mai ai oia.* Ioane 9. 1-3.

Na roto i teie nei u'iraa, a te mau Aposetolo ia Iesu, ua ite papuhia e ua ite te mau pīpī e, te ora ra tana taata matapo ra i te matamua e ua rave paha oia i te hara i mu a'e i to'na fanau matapo raa mai.

Tei taua oraraa vurua, i te matamua, i orure ai o Satane i te hau o te Atua e ua pee te mau varua taata e rave rahi i muri ia'na, o te mau melahi o te diabolō, o ratou tei tama'i atu i te mau melahi o te Atua, e ua hurihia mai Satane, e taua mau varua haapao ore atoa ra, i raro nei e aore atura ratou i faatiahia ia fanauhia ei taata. Apo 12. 7-10; Iuda 1.6.

I roto i te hoê a'oraa tuiroo a Paulo, i Ateno, ua na ô mai-ra oia i ta te Atua, "E na'na i hamani i te taata i te mau fenua atoa nei i te toto o te taata hoê ra, ei parahi i te mau fenua atou nei, e ua haapao i te tau i haapaohia i mutaa ihora e te otia o to ratou ra parahiraa." Ohipa 17. 26.

Na roto i teie nei irava ua taa maitai e, ua ite te Atua, i mutaa ihora, i te rahiraa o te taata nei, e ua haapaohia to te tahi nunaa vahi e to te tahi nunaa vahi, ei parahiraa no ratou i nia i te fenua nei.

E tuatihia teie nei parau.



E PARAU API NO TAKAROA MAI.

Na te Heheuraa Api, e te mau hoa atoa, Ia ora na outou.

Te faaite atu nei i te parau rii apî no Takaroa nei.

I na mahana rii no Titema i tae mai ai o 'Taiamani', te pahi ia o Levi. Ua faaiteite mai ra oia i te parau apî no te mau ve'a no te mau fenua papaa mai, e ei te mahana 19 no Tenuare nei, e tupu te *Ati*, o tei faaite hia mai ia i roto i te mau ve'a. Ua faataataa maira oia i te huru o te tupuraa, e te mata'i e farara mai ia, no te pae ia N. W.

I reira, ua mana'o a'era te Tavana mataeinaa e, e imi oia i te tahi vahi maitai ei faaoraraa i to'na huiiraatira. Ua poro maira oia e, e haere ana'e tatou i te hopea i nia o te fenua, e ua haere ana'e atura te huiiraatira i Gake i te imiraa i te maa vahi haapuraa, (no taua tau *Ati* ra). Ua hamani atura te taata i te mau fare i te mau vahi rii teitei o te fenua e ua hamani haere te vetahi i te fare rii i nia i te mau tumu raau rarahi, e te vetahi i roto i te mau vahi aihere, i te imiraa i te haapuraa.

E inaha! i te taeraa i taua mahana 18 e te 19 no Tenuare e mahana maitai roa e te mania; e mea matahataha roa, e te ra'i aneane maitai. Ua oaoa te huiiraatira, te mau taata atoa; ua mana'o ihora ratou e, ua aratai e hia taua *Ati* ra.

E i tau mahana rii i muri iho ua tae mai te hoê pahi no Papeete mai, na'na'tura i faaite mai e, ua tae mai te niuniu i Papeete e, ua tae taua *Ati* ra i te mau fenua Samoa ma.

I to ratou faaroo raa i te reira, oaoa'tura te mau taata atoa e ua vaere atura i to ratou maa fenua, e ua pufa i ta ratou mau opaa rii mai te fanao.

Papaia e Toae a Ma'ire.

TE MAU PARAU API

E Faautu'araa Oioi.

No to ratou eiaraa e te tupairaa i te hoê taata ruau, ua faautu'ahia na taurearea e toru ra o Walter L. Bedwell, Hazel Donovan e o John Lightcap, ia tairihia ratou e hoê a'e ahuru tairiraa i nia i te tua, ma te ahuru ore i rapae i te vahi toetoe; ua na reira mauhia ratou i te oire ra Wilmington, America.

E Tamarii Maere mau.

I te oire ra o Baltimore, America, ua fanauhia te hoê tamarii maere mau; aita to'na e arapoa. I to'na hi'oraahia i roto i te rayon X, ua ite te mau taote e, e mea poto'roa to'na arapoa e aita i tae atu i te vairaa maa. No reira te tamata nei ratou i te mau ravea atoa no te faaoraraa i taua aiu ra, e te faaamuhia taua aiu ra na roto i te hoê uaua tei faataehia i roto i to'na vairaa maa. E ere anei i te mea maere?

Ua Fatata i te Tomo.

I te 9 no Fepuare i mairi a'enei, ua û te pahi tira maha ra o Seth Parker, tei tutau maoro i Papeete nei, i te matai e te miti, tei haapau i te fenua Rarotoa ma, e ua fatata roa oia i te tomo. A roohia'i taua pahi ra i te vero ua taniuniu oia no te aniraa i te tauturu, e ua faaroohia taua aniraa e to te manua Baratane ra o Australia e ua haere oioi atura ratou e tauturu i taua pahi tei roohia i te ati, e i te hopea ua ora taua pahi ra.

Aita i Pohe roa.

I te oire ra o Massey, Canada, ua haaputuputu mai te hoê pūpū ati Inidia no te otoraa i te vahine ra o Mme George Owl, o tei parahi maoro i rotopu ia ratou. Te parahi faaati noa ra ratou i te tino pohe o taua vahine ra, o tei vai i roto i to'na afata i na hora e ono. I te paura taua tau ra inaha, ua tia maira oia i nia e ua maere roa te mau Inidia i taua ohipa ra e ua tauturu ratou ia'na i te haereraa mai i rapae i to'na afata.

E Mutoi maere mau.

I te hoê oire o tei parauhia o Springfield te vai ra te hoê raatira mutoi o Richard W. Benson to'na i'oa, o te ore e haere e imi i te mau feia rave hara. Ia ite oia e ua tupu te hoê peapea i te hoê vahi, e taniuniu noa oia i te taata tei rave i te hara e na'na iho e haere mai i te fare auri. Te parau nei taua mutoi ra e, ua noaa a'enei e 50 taata ta'na i ani, na roto i te niuniu, ia haere mai i te fare auri, e tei haere noa mai na roto i to ratou iho hinaaro.

E Maitihe huru-ê-mau.

I te oire ra o Gettysburg, America, ua tupuhia te vahine ra o Mme. Edgar HARMON i te hoê maitihe huru-ê-mau. Noa'tu i te mau huru raau atoa o tei horoahia na'na, e te mau taote, ua maitihe noa oia e 3 hepetoma te maoro. E haamata taua maitihe ra i te taime e huru ê ai te mahanahana o to'na ra tino, e aore râ, ia tuu oia i to'na rima i roto i te pape.

E Ma'i Rahi mau.

I te fenua ra o Colombo, Inidia, ua tupu te ma'i ino roa ra tei parauhia te MALARIA, e ua pohe roa e toru aburu tauatini taata, 30.000, i taua ma'i ra i roto i na ava'e e maha.

O te Tio nei.

Mai te mea te hinaaro nei outou ia ite e, e maoro anei te tau to'eto'e, a rave ia outou i te hoê tio; a aaro outou ia'na e mai te mea ua a'ohia taua tio ra, e tapao ia te reira e maoro â te tau to'eto'e. O te parau teie a W. H. RAYE, e taata faaapu tio no Long Island, e tera ta'na parau hopea, e ore roa e tia ia haavare i te tio.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.